

Motorcykelinik eqqusseqqusseqqusaannginnerup atorunnaarsinneqarnissaanut naalakkersuisut sulissuteqarnissaannut inatsisartut aalajangiiffigisassaattut siunnersuut.

(Inatsisartuni ilaasortat Knud Kristiansen aamma Siverth K. Heilmann, Atassut)

Akissuteqaat

(Ineqarnermut, Attaveqarnermut Angallanermullu Naalakkersuisoq)

Aappassaanneerpeqarnera

Naalakkersuisut Inatsisinut Ataatsimiititaliaq isumaliutissiissuteqarneranut qutsavigerusuppaat.

Naalakkersuisut nuannaarutigalugu paasivaat Inatsisartut Inatsisinut Ataatsimiititaliaani amerlanerussuteqartut siunnersuutip akuerineqarnissaa tapersersoraat. Siunnersuut akuerineqassappat, Naalakkersuisut tamanna tunngavigalugu suliassaq Naalagaaffimmi oqartussaasunut ingerlateqqissavaat.

Naalakkersuisut maluginiarpaat Inatsisartut Inatsisinut Ataatsimiititaliaani ikinnerussuteqartut Siumumeersut, siunnersuutip itigartinneqarnissaa inassutigigaat. Naalakkersuisut paasivaat Siumumiit tamatumunnga tunngavilersuutaasoq motorcykelinik atuinerup Kalaallit Nunaanni illoqarfinni ulorianartortaqarsinnaanerani kiisalu motorcykelit inuussutissarsiornermik siunertaqannginnerannik, aallaaveqartoq. Naalakkersuisut aarlerissuteqarnerit taakkua paasilluarsinnaavaat. Tamanna tunngavigalugu Naalakkersuisut oqaatigerusuppaat, aarlerissuteqarnerit taakkua siunnersuutip suliarineqarnerata ingerlaqqinnerani siunnerfilimmik ilaatinneqassasut.

Isumaliutissiissummi oqaatigineqarpoq Ataatsimiititaliap paasinninnera malillugu allaffissornikkut suliqaarneq siunnersuutip piviusunngortinneqarnissaanut attuumassuteqartussa qataatsimut isigalugu ukiup affaani sulisussamit annikinnerusussaasoq. Tamanna tunngavigalugu Ataatsimiititaliaq siunnersuuteqartutuulli naliliivoq, siunnersuutip akuerineqarnera sulisut amerlineqarnissaannik pisariaqartitsineramik kinguneqassanngitsoq.

Naalakkersuisut Ataatsimiititaliap siunnersuutip piviusunngortinneqarnissaanut atatillugu suliassap annertussusaanik naliliinerat isumaqatigaat. Taamaattorli Naalakkersuisut isumaqanngillat tamannaannaq tunngavigalugu oqartoqarsinnaasoq, siunnersuut atorfilittanit sulisorineqareersunit naammassineqarsinnaasoq. Atorfilittat ingerlaavartumik suliakkersorneqartuaannassappata, suliassat nutaat ataatsimut katillugit amerlavallaalerlutik, suliassaq ataaseq ukiup affaa sinnernagu sulisussamik pisariaqartitsiviugaluartoq, tamanna attaneqarsinnaanngitsumik suliassaqalernerannik kinguneqartussaavoq. Naalakkersuisut aamma erseqqissassavaat, ilaatigut Nuummi inissaqartitsiniarnerup kingunerisaanik Namminersorlutik Oqartussat allaffeqarfiisa ilaanni arlalinni suliassarpassuaqalerneq suliassallu amerliartornerat misigisimaneqareemat.

Taamatut oqaaseqarlunga aalajangiiffigisassatut siunnersuut Inatsisartuni suliassanngorlugu saqummiuppara.